

Glista da la pcd giuvna – stat sco emprima

Dus candidats e trais candidadas per il cussegl naziunal 2015

■ (anr/gc) La Partida cristiandemocratica (pcd) giuvna dal Grischun – enconuschenta per sia dinamica e gronds success electorals – è stada l'emprima che ha preschentà venderdi la glista cun ils tschintg candidatAs per l'elecziun da quest onn en il cussegl naziunal. Cun *Corina Caluori, René Epp, Caterina Ventrici, Tino Schneider* e *Melanie Janka* ha ella pudì resguardar tuttas trais linguas e regiuns dal chantun e persunas ch'èn gia sa cumprovadas tant en la professiun sco en incaricas politicas. Tranter ils proponids, trais giuvnas e dus giuvens, sa chattan na main che dus deputads ed ina suppleanta al cussegl grond.

Candidats e candidatas d'ina ferma glista

Il co-president da la pcd giuvna, *Severin Geisseler*, che timuna era il cumbat electoral, ha laschè sa preschentar ils tschintg candidats: *Corina Caluori*, da Panaduz ad Eigias, giurista e suppleanta al cussegl grond per ils V Vitgs; *René Epp*, Sedrun, manader da la Banca Raiffeisen Cadi e dapi l'onn passà deputà da la Cadi; *Caterina Ventrici*, Landquart ed oriundamain da derivanza taliana, giurista; *Tino Schneider*, Cuir, dapi 2014 il pli giuven deputà en il cussegl grond ed era nov co-president da la pcd e *Melanie Janka*, da Sursaissa, giurista, stada engaschada sin divers champs e che discorra era rumantsch. Tuts candidats han motivà bain l'engaschi specific e las finamiras da lur politica. Lur nominaziun è stada unanima.,



Ils tschintg candidats e candidatas da la pcd giuvna grischuna per il cussegl naziunal cun amez il co-president da partida *Severin Geisseler*. Da sanester: *Corina Caluori, René Epp, Melanie Janka, Tino Schneider* e *Caterina Ventrici*.

MAD.

Gì success e survegnì bler sustegn

Preschent a la radunanza da nominaziun è era stà cuss. naz. *Martin Candinas*. El, che ha gratulà als nominads, ha gì grond success sco commember fitg engaschà da la pcd giuvna ed è per lezza anc oz tant motor sco exempel. Il success da la pcd giuvna al legra fitg. Quella ha gì cuntanschì – alur uschedadir sut sia egida – tar las trais davosas tschernas dal cussegl naziunal il

pli aut dumber da vuschs da las partidas giuvnas en il Grischun. Ed il success da la pcd giuvna l'onn passà tar l'elecziun en cussegl grond è stà eclatant cun quatter deputads e set suppleants. Cur ch'in dad els «sesia», possia la pcd giuvna schizunt furmar in'atgna fracziun.

Il president da la pcd grischuna, cuss. dals stans *Stefan Engler*, è satisfatg che la pcd giuvna è uschè engaschada e po pre-

schentar ina ferma glista. Essend quella colliada cun quella da la partida-mamma rinforzia quai lezza considerablamain. Ses giavisch è che la pcd grischuna possia cuntanscher 2015 ina cumpart da 17% da l'electorat e qua tras in mandat cumplain. Quai astgass esser il cas quest onn, siond che tschella giada hajan be paucas vuschs mancà persuerter. El giavischa a la pcd giuvna bun success electoral.